

concessit, et scripto suo firmavit; ecclesiam Sancti Ursicini de Nugerol, vineas de Bielno, curiam in Boescorth.

Decernimus ergo ut nulli omnino hominum liceat præfatum locum temere perturbare, aut ejus possessiones auferre, vel ablatas retinere, minuire, seu aliquibus vexationibus fatigare, sed omnia integra conserventur eorum, pro quorum gubernatione ac sustentatione concessa sunt, usibus omnimodis profutura, salva sedis apostolicæ auctoritate, et diocæsani episcopi canonica justitia. Si qua igitur in futurum ecclesiastica sæcularisve persona, hanc nostræ constitutionis paginam sciens, contra eam temere venire tentaverit, secundo tertiove communita, si non satisfactione congrua emendaverit, potestatis honorisque sui dignitate careat, reamque se divino judicio existere de perpetrata iniquitate cognoscat, et a sacratissimo corpore ac sanguine Dei et Domini nostri Redemptoris Jesu Christi aliena fiat, atque in extremo examine districtæ ultioni subjaceat. Cunctis autem eidem loco justa servantibus, sit pax Domini nostri Jesu Christi, quatenus et hic fructum bonæ actionis percipiant, et apud districtum judicem præmia æternæ pacis inveniant. Amen.

Ego Eugenius Catholicæ Ecclesiæ episcopus.

Datum Lausannæ per manum Guidonis sanctæ Romanæ Ecclesiæ diaconi cardinalis et cancellarii, xvi. Kalend. Junii, indictione xi, Incarnationis Dominicæ anno 1148, pontificatus vero domini Eugenii III papæ anno iv.

CCCIII.

Ad Humbertum Bizuntinensem archiepiscopum, etc.
—*Ut contemptum Romanæ Ecclesiæ digne puniant in presbytero qui excommunicationem ab eo latam transgressus fuerat, et redditus Balmensis monasterii Cluniacensibus subripuerat.*

Anno 1148, Maii 20.)

[BOUQUET, XV, 451.]

EUGENIUS episcopus, servus servorum Dei, dilectis filiis H[UMBERTO] Bisuntinensi archiepiscopo, P. decano et toti capitulo S. Stephani, salutem et apostolicam benedictionem.

Ex parte Cluniacensium fratrum querelam accepimus, quod Aimo presbyter in ecclesia de Biliaco, quam Balmensis ecclesia tricenaria possessione et amplius sine interruptione possedit, super excommunicationem nostram diu cantavit, et redditus ecclesiæ qui Balmensi debentur partim violentia, partim sibi furto retinuerit. Verum quia fratribus Cluniacensibus in sua justitia, maxime in his quæ ad Balmense cœnobium pertinent, deesse non possumus vel debemus, quibus idem cœnobium cum omnibus appendiciis suis quibus tempore Alberici abbatis et postea investitum fuit, donavimus; per præsentia vobis scripta mandamus atque præcipimus quatenus transgressionem sententiæ nostræ et contemptum sanctæ Romanæ Ecclesiæ in prædicto presbytero digne et sufficienter puniatis; et redditus quos Balmensi ecclesiæ subripuit, ex integro ita reddi faciatis.

PATROL. CLXXX.

tis, ne iteratus clamor ad aures nostras perveniat, et presbyter amplius in ecclesia non gloriatur, in qua tandiu excommunicationem contempsit, et nobis inobediens permansit.

Datum Lauzanæ xiii Kal. Junii.

CCCIV.

Monasterii Ruggisbergensis protectionem suscipit possessionesque confirmat.

(Anno 1148, Maii 27.)

[SOLOTHURNER, *Wochenblatt*, 1829, p. 555, teste Stettler, *Regestem der Klöster von Bern*, p. 11.]

CCCV.

Ad abbatem Sugerium. — Mutato consilio non jam monachos ad S. Genovesæ ecclesiam mittere vult sed canonicos regulares.

(Anno 1148, Jun. 16.)

[MANSI, *Concil.*, XXI, 638.]

EUGENIUS episcopus, servus servorum Dei, dilecto filio SUGERIO abbati S. Dionysii, salutem et apostolicam benedictionem.

Cum Dominus et Redemptor noster pax et veritas esse noscatur, ad Patris dextram ascensurus, discipulis suis velut ex testamento pacem relinquens, ut eam in se haberent, et prædicarent aliis, imperavit. Inde est, quod a Christo diligi, et inter discipulos ejus creditur deputari, qui et pacem diligit, et eam inter suos subditos nititur conservare. Quia igitur in apostolicæ sedis specula a Domino constituti, B. Petri apostolorum principis existimus successores, præceptum quod pro religione monastica in ecclesia Sanctæ Genovesæ dedisse meminimus, pro bono pacis, si regulares canonicos ejusdem ecclesiæ canonici salvis eorum præbendis receperint, immutamus: præcipientes, ut beneficia quæ monachis, si in præfata ecclesia fuissent suscepti, duximus deputanda, canonicis ipsis per te auctoritate apostolica deputentur. Quod si facere noluerint, præceptum de monachis inibi statuendis inviolabiliter præcipimus observari.

Datum Vercellis, xvi Kal. Julii.

CCCVI.

Monasterii Claravallis Mediolanensis possessiones confirmat.

(Anno 1148, Jun. 25.)

[GIULINI, *Mem. di Milan.*, V, 478-79.]

CCCVII.

Alberoni archiepiscopo Trevirensi, et Alberoni episcopo Virdunensi, et Metensis Tullensisque Ecclesiarum archidiaconis mandat, Matthæum ducem sub excommunicationis pœna admoneant ut castrum prope Tullum ædificatum destruat.

(Anno 1148, Jun. 30.)

[D. CALMET, *Hist. de Lorraine*, II, Pr., p. cccxxxiv.]

EUGENIUS episcopus, servus servorum Dei, venerabilibus fratribus A. [ADALBERONI] Treverensi episcopo, Virdunensi episcopo [ALBERONI], et dilectis filiis archidiaconibus Metensis et Tullensis Ecclesiæ, salutem et apostolicam benedictionem.

Quemadmodum sancta Ecclesia in spiritualibus, sine ruga, macula, et schismate, in unitatis debet perpetuo splendore clarescere, ita in temporalibus